

慈氏菩薩所說大乘緣生稻蘄喻經

唐三藏沙門大廣智不空奉詔譯

如是我聞一時婆伽梵住王舍城鷲峯山中與大苾芻僧千二百五十人俱及大菩薩摩訶薩衆爾時慧命舍利子往至慈氏菩薩摩訶薩經行處其慈氏菩薩與舍利子俱坐磐石上時慧命舍利子問慈氏菩薩摩訶薩言今日世尊觀見稻蘄告諸苾芻而說是語汝等苾芻若見緣生即是見法若見法即見佛婆伽梵如是說已默然而住如來所說是經當有何義云何是緣生云何是法云何是佛云何見緣生即見法云何見法即見佛說是語已慈氏菩薩摩訶薩告舍利子言薄伽梵常爲苾芻說如此義若見緣生即見法若見法即見佛緣生者所謂無明緣行行緣識識

緣名色名色緣六處六處緣觸觸緣受受緣愛愛緣取取緣有有緣生生緣老死如來說此是爲緣生云何是法如來略說八支聖道果得涅槃是名爲法云何是佛覺悟一切法故以聖慧眼證於涅槃見作菩提所學之法是名爲佛云何見緣生如來說此緣生常住與十無人無我無衆生無壽命不顛倒無生無作無爲無對無礙見自性寂靜即見法若見如是種類常住無人無我無衆生無壽命不顛倒無生無對無礙是即見法從此已後即見法身得見如來現證正智又問緣生者是何義答言有因有緣非無因緣名爲緣生而於此中如來略說緣生之相由此因故能生是果若如來出世及不出世法性法住法位順於緣生真如不顛倒如不異如真實不真實

不顛倒不錯謬爲如是等復次緣生由二種
因起云何爲二一者繫屬因二者繫屬緣其
緣生法應知二種所謂外內外緣生者繫屬
因云何所謂從種子生芽從芽生葉從葉生
枝從枝生莖從莖生幹從幹生華從華生果
若無種子芽無從生乃至無華果亦無所從
生有種故生芽乃至有華生果其種不作是
念我能生芽芽亦不作是念我從種生乃至
華亦不作是念我能生果果亦不作是念我
從華生然有種子故生芽乃至有華生果如
是外緣生應知繫屬於因云何外緣生繫屬
於緣所謂六界和合緣生繫屬於緣云何六
界地水火風空時和合緣生繫屬於緣云何
地界水火風空時界令種子攝持名爲地界
令種子滋潤名爲水界令種子成熟名爲火

界令種子增長名爲風界令種子作無障礙
名爲空界令種子變易名爲時界若無眾緣
子不生芽若不闕地界不闕水火風空時界
則一切和合種子生芽其地界不作是念我
能攝持種子水界不作是念我能滋潤種子
火界不作是念我能成熟種子風界不作是
念我能增長種子空界不作是念我能令種
子作無障礙時界不作是念我能變易種子
其種子亦不作是念我從眾緣而得生芽然
假如是種子生芽其芽不自作不佗作不
俱作不自在天作不時變易作不自性生不
繫屬作者無因得生如是種子以地水火風
空時和合故而生此外緣生法應知五種不
常不斷不移轉因少果多相似相續不生異
物云何不常種子芽異故不即是種是芽亦

不以壞種而得生芽實種壞故而生以種壞芽生故名不常云何不斷先不壞種而生芽亦非不壞如是種和合生芽名為不斷不移轉者種子芽為異故因少果多者種子少果實多相似相續者隨其植種收果亦耳如是外緣生法五種應知云何內緣生有二種得生云何為二種一者繫屬因二者繫屬緣內緣生法繫屬於因云何所謂無明緣行乃至生緣老死若無無明則無行然有無明即有行乃至有生緣老死得生其無明不作是念我能生行行不作是念我從無明生乃至生不作是念我能生老死然有無明即有行生乃至有生即有老死生如是內緣生法繫屬於因云何內緣生法繫屬於緣六界和合生云何六界和合所謂地水火風空識界和合

緣生繫屬於緣云何地界令身聚合堅體名為地界云何水界令身作攝持名為水界云何火界令身中食飲成熟名為火界云何風界令身中作出入息名為風界云何空界令身中成竅隙名為空界云何識界令轉名色如束蘆五識相應有漏意識名為識界若無六界則不成身若不闕內地界不闕水火風空識界則一切和合能生其身其地界不念我能令身聚合堅體水界不念我能令身作攝持火界不念我能令身中食飲成熟風界不念我能令身作出入息空界不念我能令身中成竅隙識界亦不作是念我能轉名色猶如束蘆其身亦不作是念我被眾緣所生然有如是眾緣而生其身是地界無我無人無命無壽者無意生無孺童無女無男無非

男無吾我亦無餘水火風空識界亦無我無人無命無壽者無意生無儒童無女無男無非男無吾我無餘云何無明於此六界起一想合想常想堅想常恒想樂想靜想衆生想命想壽者想意生想儒童想吾我作者想生如是種種無知名爲無明於如有無明境界生貪瞋癡於彼貪瞋癡生行於行事施設名爲識其識生四蘊彼名色所依諸根則六處三法和合名爲觸觸生受受耽著故生愛愛廣大故名爲取取復生有業有作因生蘊蘊熟故名老蘊壞故名死於愛迷惑貪著熱惱故名愁追感往事言音哀感名爲歎五識身相應名爲苦意不悅故名憂隨煩惱故名爲惱愚闇名無明造作名爲行了別名爲識互相攝持爲名色依處所故名爲六處觸境

故名爲觸領納故名受渴愛故名爲愛取著故名爲取取復生有故名爲有能生故名生根熟故名老滅壞故名死哀感故名愁悵快故名歎意不悅故名憂逼迫身故名爲苦不稱情故名惱不修真實行名邪行無知名無明有無明故種種造作福近行行非福近行行不動近行行起福近行行非福近行行者故名爲識是故名爲無明緣行起非福近行行非福近行者亦即是識是故名行緣識起不動近行行不動近行行者亦是於識是故名爲識緣名色名色增長作六處門是故名爲名色緣六處六處身轉是故名爲六處緣觸同類觸生同類受是故觸緣受於受差別耽著喜悅是故名爲受緣愛愛耽著樂故愛不捨數數忻求故名爲愛緣取如是營求

興十

十四

復生有起業於身於語於意是故名爲取緣
有從業生五蘊轉名爲有緣生從生蘊令熟
壞滅名生緣老死如是名爲十二緣生迭互
爲因不常不造作無思亦無緣生無盡法無
離欲法無滅法無始來流轉不間斷隨轉如
河駛流設使緣生不間斷隨轉如河駛流是
十二支緣生四支和合而作轉因云何爲四
所謂無明愛業識是識種子自性爲因業由
自性爲因無明愛煩惱自性爲因業煩惱識
能生種子如是業識作種子由愛識作種子
沃潤無明識令種子開發其業不作是念我
與識種子作由愛不作是念我與識種子作
沃潤無明不作是念我令識種子開發識種
子亦不作是念我從衆緣而生然實識種子
安立業煩惱以愛令沃潤以無明土覆生名

色芽其名色芽不自作不他作不二俱作不
自在天作不時變易作不從自性生不繫屬
因無因亦不生然復從父母和合時相應及
餘緣相應相續生是識種子於母腹中名色
芽生於無生無我授法如幻相因緣不闕從
五種緣生眼識與十云何五種眼緣色明虛空從
彼生作意眼識作依止色作所緣光明以爲
照虛空作無礙從彼生作意以爲審慮若無
衆緣眼識不生若闕內眼處如是色光明虛
空作意則眼識不生如是五緣不闕則一切
和合能生眼識其眼不作是念我與眼識作
所依其色不作是念我與眼識爲所緣光明
不作是念我與眼識作照緣虛空不作是念
我與眼識爲無礙緣所生意不作是念我與
眼識作審慮又眼識不作是念我爲衆多緣

所生然有衆多緣而生眼識餘四根者應如
前知實無有法不從此世移轉至於彼有業
報施設因緣不闕故譬如明鏡現其面像其
面像不移轉至於鏡中而此鏡中有其面像
因緣不闕故如是不從此滅至於餘處有業
果感招因緣不闕故譬如月輪去地四萬由
旬於金器中而有少水則現月像而實不從
彼謝至於金器少水中現然有衆緣和合影
現如是不從此滅生於餘處有業報相感因
緣不闕故譬如無薪火則不生有薪則火生
業煩惱所生識種子從彼生處相續名色芽
轉如是無生無我法無所攝法互爲因緣如
幻相自性法因緣不闕內緣生法五種應知
不常不斷不移轉因少果多相似相續生云
何不常從此邊蘊死於餘處邊蘊生非即死

邊蘊是彼生邊蘊然死邊蘊滅於彼生邊蘊
起是故不常云何不斷不先滅於死邊蘊而
起生邊蘊亦非不滅於死邊蘊即於彼時而
生中有蘊如秤不低昂名爲不斷云何不移
轉然於異類轉生名不移轉云何因少果多
於此身作少善惡業於來生身多受善惡報
云何相似相續猶如現受身作業即於來生
受報若是此緣生法如實以正慧眼長時修
無人無我不顛倒不生不滅無作無爲無礙
無所緣寂靜無畏無奪無盡如幻自性空寂
不堅如痛如癰質礙無常性苦性空性無我
性則前際不流轉謂我於過去爲曾有耶誰
爲我過去曾爲有耶我於過去云何有耶復
於後際流轉謂我於未來當有耶誰謂我未
來當有耶我於未來當云何有耶我於未來

不有耶誰謂我於未來不有耶我於未來云
何不有耶復於中際不流轉我於今有耶誰
謂我今有耶云何謂我今有耶此有情於此
歿復往何處所有沙門婆羅門世間中異見
所謂我是繫衆生見繫壽者見繫諸見繫希

望吉祥繫若以正見相應於此時悉斷諸結
證得徧知如斷多羅樹無所有性入於勝義
於諸趣長時悟不生不滅得成就忍廣作無
邊利樂有情事若有善男子善女人於此經
中若須臾頃審諦觀察緣生義理者即能頓
滅無始時來極重業障廣集福德智慧通達
永斷邪見說法無畏大德舍利子婆伽梵與
彼善男子善女人授無上等覺大菩提記具
壽舍利子并天龍藥叉彥達縛阿蘇囉藥嚩
拏緊那囉摩護囉誡人及非人聞慈氏菩薩

說是經已心大忻悅深生隨喜從此而起禮
慈氏菩薩足歡喜奉行

慈氏菩薩所說大乘緣生稻稈喻經